



Sesida dals

Communitgà ils

Protocol nr.

24 d'october 2023

26 d'october 2023

826/2023

Incumbensa Rettich

concernent l'examinaziun dal concept da Housing First

Resposta da la Regenza

Il concept da Housing First prevesa da princip ch'i vegnia mess a disposiziun spazi d'abitar a persunas senza abitaziun e/u senza tetg, e quai senza fixar cundiziuns spezialas per quest spazi d'abitar. Il concept è adattà cunzunt per persunas cun in tschert basegn da sustegn, per regla per persunas ch'èn gia ditg senza abitaziun e che han ina dependenza da drogas e/u ina malsogna psichica. Persunas che fan diever da Housing First vivan en moda independenta e ston respectar las cundiziuns da locaziun usitadas. Ellas survegnan dentant sustegn ed assistenza. Uschia survegnan ellas access ad in provediment medicinal psichiatric sco er a purschidas d'agid per persunas dependentas. Plinavant vegn promovida l'integraziun sociala. Cumbain ch'i na vegn pretendì nagina abstinenzia u nagins tractaments, vegnan las utilisadras ed ils utilisaders da Housing First encuraschads da minimar il consum nuschaivel e d'acceptar agid. Il concept da Housing First garanteschia agid cuntinuant, er en cas da midadas da chasa vulidas u nunvulidas u en cas da crisas. Il concept gida a meglierar la sanadad ed il bainesser da las persunas sustegnidas ed augmenta uschia lur schanzas da sortir duravlamain da la situaziun senza abitaziun e/u senza tetg.

En concordanza cun las enconuschientschas dals rapports che Infodrog ed il Lavuratori da management davart la politica da dependenzas han elavurà per incumbensa dal chantun, ha la Regenza menziunà – en ses conclus d'extender las purschidas da l'agid nunburocratic per persunas dependentas – ch'er la purschida d'abitar per persunas dependentas duaja vegnir prendida per mauns. Areguard quest aspect vegn la situaziun plinavant analisada cuntinuadamain a maun da las infurmaziuns dals servetschs socials regionalis ed a maun da la lavur sociala extra muros da l'Uniun per

l'agid da survivenza dal Grischun («streetwork»). Resguardond questas infurmaziuns vegn perquai actualmain gia elavurà in project da pilot «Housing First / Accompagnament d'abitar» en la regiun da Cuira. Il project da pilot vegn sviluppà ensemen cun in'organisaziun che dispona gia d'ina purschida cumparegliabla per personas cun impediments psichics (e cun malsognas da dependenza) en il chantun. Las utilisadras ed ils utilisaders vivan en lur atgna abitaziun e vegnan sustegnids temporarmain u duravlamain tras l'organisaziun en connex cun differentas incumbensas e differentes temas, per ch'ellas ed els possian abitar en moda independenta. Quests servetschs èn resalvads oz a personas che retiran ina renta da la AI. En il rom dal project da pilot vegn annullada questa restricziun da l'access. Il project da pilot duai cumenzar durant l'emprima mesadad da l'onn 2024.

Las pli grondas sfidas en connex cun la realisaziun dal concept da Housing First vegnan ad esser la (svelta) disponibladad, il mantegniment e la garanzia da spazi d'abitar pajabel sco er l'esistenza da l'acceptanza necessaria da vart da las locaturas e dals locaturs sco er da vart da las vischinas e dals vischins. Perquai ch'ins sto pli-navant quintar cun consequenzas per ils custs da l'agid social da las vischnancas, vegn l'acceptanza en las vischnancas ad esser in'ulteriura sfida. Tras il project da pilot spetga la Regenza in svelt sustegn da las emprimas partecipantas e dals emprims partecipants sco er enconuschientschas relevantas areguard ils facturs da success che stattan en connex cun la realisaziun d'in concept da Housing First en il chantun Grischun.

Sa basond sin questas explicaziuns propona la Regenza al Cussegl grond d'acceptar e da stritgar questa incumbensa sco liquidada concernent l'examinaziun dal concept da Housing First, sco er da la refusar concernent la preschentaziun generala che duai vegnir suttamessa al Cussegl grond.



In nome del Governo

Il Presidente:

Peter Peyer

Il Cancelliere:

Daniel Spadin